



L. Conseier de Procura Gianluigi De Sirena ge moscia l'projet de restruturazion al president de l'Union di Ladins de Fascia Fernando Brunel.

FRABICAC STORICS

La veia Moniaria doventarà Ciasa Ladina del 2021

Dò aer aproà l'projet esecutif, l'Comun General de Fascia à ciapà l'ultim contribut da la Region Trentin Sudtiroi e l'pel jir inant con la prozedures de apalt

L'é da egn che se reiona de la restruturazion de la Ciasa de la Moniaria a Sèn Jan, che é oramai jita en roina, ma zacan somea che pian pian chest projet posse veder n compiment.

Mingol de storia

Chest frabicat storich del 1600, logà tel zenter cultural e aministratif de Fascia, l'é semper stat proprietà de la Comunità de Fascia: l'ge vegnia conzedù en usufrut al monech per so servije. Dai egn '80, per presciapech 20 egn, laite à abù sia senta l'Union di Ladins de Fascia, ensin al 2003, canche no se à più podù ite. Ence dò, chesta sociazion à semper abù a cher l' destin de la Moniaria. L'à spent acioche la proprietà, passèda ti egn a la Parochia

de Sèn Jan, vae deretorn a la comunanza e del 2011, tel chéder del projet de intervent global de razionalizazion e valorizazion de duta l'area de Sèn Jan, l'à enjignà n prum sboz de projet de restruturazion, lurà fora debant dai architec Ghetta e Tamion da Vich. Chest projet l'é stat prezios per poder aer azess ai finanziemenc publics: del 2009 la Moniaria é doventèda del Comprenjorie e dapò del Comun General che l'ha metuda tel FUT (Fondo Unich Teritorièl). Ma dut se à fermà.

D'aisciuda del 2014, semper sun spenta de l'Union di Ladins, l'Comun general à portà dant domana de finanziament a la Provincia, aldò de n bando per l' restaure de frabicac sot tutela di bens artistich e architetonics, ma la mención de scioldi publics à destudà la speranzes. Speranzes che se à endò empeà a la fin del 2014, canche l'assessor regionèl a la mendranzes linguistiches Bepe Detomas à fat orir tel bilanz de la Region Trentin-Sudtiroi n nef capitol per investimenc e l'ha metù a la leta sul bilanz del 2015 e per i trei egn dò la ressors per la restruturazion.

I vèrsc di ùltimes egn

Da enlouta l'é passà 4 egn, ma entornvia la Ciasa de la Moniaria no se à amò vedù mever nia, e te l'ùltim temp la domana de saer a che pont che l'era chest projet é stata uzèda fora più outes ence te scontrèdes publiches e istituzionèles.

Dò l'projet preliminar, fat del 2016 amò dai architec Ghetta e Tamion, l'Comun general à dezidù de ge passèr l'encèria de dèr sù la projetazion definitiva e esecutiva a l'APAC, l'Agenzia Provinzièla per i Apalc e i Contrac, che del 2017 à enciarià l'architet trentin Marco Giovanazzi.

La Region Trentin Sudtiroi à fat sobito na pruma delibera de conzescion de 543.150 euro, e de chisc 250.000 ge é stac dac dantfora al Comun General, e dapò l'ha deliberà

amò etres doi stanziemenc del 2016 e del 2017 per ruèr a n emport complessif de 1.154.536 euro, spetan la documentazion su l'avanzament di lurieres. Endèna l'é stat ence vèlch mudament del projet che à entardivà.

Tel meis de firé de chest an l'Comun general ge à manà a la Region l'projet esecutif, che porta dant l'pian finanzièl con n cost de 1.922.558 euro e sun chest la Region à deliberà l'contribut, che pel ruèr fin al 90% de la speisa e che l'é donca de 1 milion 730.302 euro.

Cosci duta la prateghes anter l'Comun general, con sia secretèra Elisabetta Gubert, e i ofizies de l'assessorat regionèl a la mendranzes con a cef Giovanna Chiochetti, é ruèdes a compiment.

Dò aer ciapà la documentazion de aproazion de projet esecutif, ai 8 de mè la Region à aproà la delibera de l'assessor Manfred Vallazza per l'ùltima pèrt del finanziament de 575.766,83 euro, e ades l'Comun general pel jir inant con la prozedures de apalt.

L'Conseier de Procura del Comun general de Fascia Gianluigi De Sirena, che à portà inant dut l'iter, l'ha dit che ades vegnarà fat la gara del diretor di lurieres e dapò manà inant la documentazion a l'APAC per enjignèr l'encant. L'é pervedù che d'aisciuda del 2020 se posse dèr sù i lurieres, che i cognessa scomenzèr amò inant l'istà per se serèr sù de jugn del 2021.

La Ciasa de la Moniaria ge darà alberch a l'Union di Ladins de Fascia e a de altra ativitèdes che à desche obietif l' stravardament e la valorizazion de la cultura ladina, desche sales per esposizion e per la produzion de programès ladins per la radio e la televizion.

Sarà donca na "Ciasa Ladina", lochèda ai piesc de la Pief, visavi a l'Istitut Cultural Ladin e vejina al Comun general, tel cher religious, cultural, aministratif e sozièl de noscia val.

Lucia Gross



La Ciasa de la Moniaria, apede a la Pief, te n retrat de jai 20 egn.